

Headline	Roslinda, Sukri jadi pilihan	Language	MALAY
Date	12. Apr 2008	Page No	29
Media Title	Berita Harian	Article Size	224 cm2
Section	Sukan	Frequency	Daily
Circulation	217920	Color	Full Color
Readership	2083000		



Roslinda, Sukri jadi pilihan

RATU lompat bergalah negara, Roslinda Samsu bersama pemain hoki negara, Mohamad Sukri Abd Mutalib (*gambar*) menjadi pilihan untuk menerima anugerah utama Majlis Sukan Universiti Malaysia (Masum) 2007 yang akan disampaikan di Pusat Konvensyen Antarabangsa Persada Johor, Johor Bahru, malam ini.

Roslinda yang juga siswi Universiti Putra Malaysia (UPM) adalah nama yang tidak asing lagi dan kemenangannya di Kejohanan Trek dan Padang Asia serta emas di Sukan Sea 2007, sudah cukup menjadikannya pilihan untuk meraih anugerah Olahragawati Masum.

Dia yang sudah melayakkan diri ke Sukan Olimpik di Beijing, Ogos ini, akan dicabar oleh bintang harapan Masum 2006 yang juga penuntut Universiti Teknologi Mara (UiTM), Zatil Iman Abdul Ghani yang membantu negara menyapu bersih pingat emas bagi acara regu, trio dan berpasukan di Sukan Sea 2007.

Tiga calon lain dalam kategori Olahragwati adalah Puah Pei San dari Universiti Teknologi Malaysia (UTM) yang juga tonggak bola jaring negara, Faridah Sulong (Universiti Tun Hussien Onn) bagi acara sukan kayak serta Lee Yuen Hong (Universiti Sains Malaysia) yang juga pemenang pingat perak Kejohanan Karate Asia di Singapura.

Bagi Kategori Olahragawan pula, Mohamad Sukri menyerlah dalam menggalas tanggungjawab sebagai pemain posisi tengah skuad kebangsaan dalam beberapa kejohanan antarabangsa.

Malah, pemain hoki kelab Ernst & Young yang juga penuntut UPM itu pernah terpilih sebagai Olahragawan Sekolah Sukan Bandar Penawar.

Beliau bakal menandingi empat calon lain - atletik kayak UTM, Zulmajdi Zakaria yang pernah memperoleh pingat emas pada Sukan Masum 2007 dan Kejohanan Mendayung Unites, pemenang pingat emas acara beregu, trio, campuran dan masters bowling di Sukan Arafura 2007, Muhammad Zaim Zulfahlie Said (UIA), Sirichai Manichorte Sulong (Universiti Pertahanan Nasional

Malaysia) yang meraih pingat emas di Kejohanan MMU Intersiviti TKD serta peserta akhir acara 500 meter dan 1000m Kejohanan Kenu Kebangsaan, Muhammad Ahnaf Tarmidi.

Majlis Anugerah Masum yang bertujuan mengiktiraf sumbangan atlet, pegawai dan individu yang mengharumkan nama Masum serta negara dalam sukan menerusi pencapaian cemerlang mereka, kali ini dijadual dirasmikan Menteri Pengajian Tinggi, Datuk Seri Mohamed Khaled Noridin.

